

摛藻堂四庫全書薈要

集部

欽定四庫全書叢要

集部

漢魏六朝百三家集卷二十五

四

詳校官候選知縣臣吳旬華



欽定四庫全書
舊要卷一萬九千六百十三

集部

漢魏六朝百三家集卷二十四

明 張溥 輯

魏文帝集

一



浮淮賦

有序

建安十四年王師自譙東征大興水軍汎舟萬艘時予從行始入淮口行泊東山覩師徒觀旌帆赫哉盛矣雖

孝武盛唐之狩舳艤千里殆不過也乃作斯賦云

泝淮水而南邁兮汎洪濤之湟波仰嵒岡之崇阻兮經
東山之曲阿浮飛舟之萬艘兮建干將之銛戈揚雲旗
之纊紛兮聆榜人之謹譁乃撞金鐘爰伐雷鼓白旄冲
天黃鉞扈扈武將奮發驍騎赫怒於是驚風汎涌波駭
衆帆張羣櫂起爭先逐進莫適相待

滄海賦

美百川之獨宗壯滄海之威神經扶桑而遐逝跨天涯

而託身驚濤暴駭騰聊澎湃鏗訇隱湧沸凌邁於是
龜鼈漸離汎盪淫遊鴻鸞孔鵠哀鳴相求揚鱗濯翼載
沉載浮仰唼芳芝俛漱清流巨魚橫奔厥勢吞舟爾乃
釣大貝採明珠搴懸黎收武夫窺大麓之潛林覩瑤木
之羅生上蹇產以交錯下來風之泠泠振綠葉以葳蕤
吐芬葩而揚榮

濟川賦

臨濟川之層淮覽洪波之容裔渾騰揚以相薄激長風

而亟逝漫浩汗而難測眇不覩其垠際於是龜龍神嬉
鴻鸞羣翔鱗介霍驛載止載行俯唼菁藻仰餐若芳永
號長吟延首相望美玉昭晰以曜暉明珠灼灼而流光
於是遊覽既厭日亦西傾朱旗電曜擊鼓雷鳴長驅風
厲悠爾北征思魏都以偃息託華屋而遨遊酌玄清于
金罍騰羽觴以獻酬

臨渴賦

建安八年至譙余兄弟從上拜墳墓遂乘馬遊觀經東

園遵渦水相伴乎高樹之下駐馬書鞭作臨渦之賦曰
蔭高樹兮臨曲阿微風起兮水增波魚頡頏兮鳥逶迤
雌雄鳴兮聲相和萍藻生兮散莖柯春木繁兮發丹華

述征賦

建安十三年荆楚傲而弗臣命元司以簡旅予願奮武
乎南鄴伐靈鼓之硼隱兮建長旗之飄颻躍甲卒之皓
旰兮馳萬騎之瀏瀏揚凱悌之豐惠兮仰乾威之靈武
伊皇衢之遐邇兮維天網之畢舉經南野之舊都聊弭

節而容與遵往初之舊迹順歸風以長邁鎮江漢之遺
民靜南畿之遐裔

校獵賦

披高門而方軌邁夷途而直駕長鋟糴電飛旗拂天部
曲按列什伍相連峙如叢林動若奔山超崇岝之曾崖
厲障澨之雙川列翠星陳戎車方轂風迴雲轉埃連飈
屬雷響震天地譟聲蕩山岳遂躡封豨籍塵鹿捎飛鳶
接鷺鷺聚者成丘陵散者填溪谷流血赫其丹楚羽毛

紛其爵目考功効績班賜有敘分授甘魚飛酌清酷割
鮮楚享舉爵鳴鼓鑾輿促節騁轡廻翔望雀臺而增舉
涉幽瀆之花梁

又

純冲天之素旄兮靡格澤之修旃雄戰趨音皇而躍厲兮
黃鉞扈而揚鮮

千乘亂擾萬騎奔走經營原隰騰越峻岨形弓斯彀戈

鍾具舉

登臺賦

建安十七年春遊西園登銅雀臺命余兄弟並作其詞
曰

登高臺以騁望好靈雀之麗嫋飛閣崛其特起層樓儼
以承天步逍遙以容與聊遊目於西山溪谷紓以交錯
草木鬱其相連風飄颻而吹衣鳥飛鳴而過前申躊躇
以周覽臨城隅之通川

登城賦

孟春之月惟歲權輿和風初暢有穆其舒駕言東道陟
彼城樓逍遙遠望乃欣以娛平原博敞中田闢除嘉麥
被壟緣路帶衢流莖散葉列倚相扶水幡幡其長流魚
裔裔而東馳風飄颻而既臻日掩藪而鹵移望舊館而
言旋永優游而無為

感物賦

喪亂以來天下城郭丘墟惟從太僕君宅尚在南征荆

州還過鄉里舍焉乃種諸葵於中庭涉夏歷秋先盛後衰悟興廢之無常慨然永歎乃作斯賦

伊陽春之散節悟乾坤之交靈瞻玄雲之蓊鬱仰沉陰之杳冥降甘雨之豐霈垂長溜之泠泠掘中堂而為圃植諸葵於前庭涉炎夏而既盛迄凜秋而將衰豈在斯之獨然信人物其有之

感離賦

有序

建安十六年上西征余居守老母諸弟皆從不勝思慕

乃作賦曰

秋風動兮大氣涼居常不快兮中心傷出北園兮彷徨
望衆墓兮成行柯條憐兮無色綠草變兮萎黃感微霜
兮零落隨風雨兮飛揚日薄暮兮無悰思不衰兮愈多
招延佇兮良久忽踟蹰兮忘家

離居賦

惟離居之可悲廓獨處於空牀愁耿耿而不寐歷冬夜
之悠長驚風厲於閨闥忽增激於中房動帷裳之曉曖

彼明燭之無光

戒盈賦

有序

避暑東閣延賓高會酒酣樂作悵然懷盈滿之戒乃作
斯賦

惟應龍之將舉飛雲降而下征資物類之相感信貫徹
之通靈何今日之延賓君子紛其集庭信臨高而增懼
獨處滿而懷愁願羣士之箴規博納我以良謀

永思賦

仰北辰而永思沂悲風以增傷哀遐路之漫漫痛長河
之無梁願託乘於浮雲嗟逝速之難當

悼天賦

有序

族弟文仲亡時年十一母氏傷其天逝追悼無已余以
宗族之愛乃作斯賦

氣紓結以填胸不知涕之縱橫時徘徊於舊處覩靈衣
之在牀感遺物之如故痛爾身之獨亡愁端坐而無聊
心慙慙而不寧步廣廈而踟躕覽萱草於中庭悲風蕭

其夜起秋氣惛以厲情仰瞻天而太息聞別鳥之哀鳴

寡婦賦

有序

陳留阮元瑜早亡每感存其遺孤未嘗不愴然傷心故作斯賦

惟生民兮艱危於孤寡兮常悲人皆處兮歡樂我獨怨兮無依撫遺孤兮太息俛哀傷兮告誰三辰周兮遞照寒暑運兮代臻歷夏日兮苦長涉秋夜兮漫漫後霜隕兮集庭燕雀飛兮吾前去秋兮就冬改節兮時寒水凝

兮成冰雪落兮翻翻傷薄命兮寡獨內惆悵兮自憐

出婦賦

念在昔之恩好似比翼之相親惟方今之疏絕若驚風
之吹塵夫色衰而愛絕信古今其有之傷篤獨之無恃
恨胤嗣之不滋甘沒身而同穴終百年之常期信無子
而應出自典禮之常度悲谷風之不答怨昔人之忽故
被入門之初服出登車而就路遵長塗而南邁馬躊躇
而廻顧埶鳥鋟而高飛愴哀鳴而相慕撫騑服而展節

即臨沂之舊城踐麋鹿之曲蹊聽百鳥之羣鳴情悵恨
而顧望心欝結其不平

愁霖賦

脂余車而秣馬將言旋乎鄴都立雲黯其四塞雨濛濛
而襲予塗漸洳以沉滯潦淫衍而橫湍豈在余之憚勞
哀行旅之艱難仰皇天而太息悲白日之不暘思若木
以照路假龍燭之末光

喜霽賦

乃命駕而言歸啟吉日而北巡厭羣萌之至願感上下
之明神密雲興之坱圠甘雨降以灑塵既灑塵而為塗
惟平路之未晞激清風以漂潦發皎日之陽暉振余策
而長驅忽臨食而忘飢

彈碁賦

惟彈碁之嘉巧邈超絕其無儔苞上智之弘略允貫微
而洞幽局則荆山玅璞發藻揚暉豐腹高隆庫根四頽
平如砥礪滑若柔荑碁則玄木北幹素樹西枝洪纖若

一脩短無差象籌列植一據雙螭滑石霧散雲布四垂
然後直扣先縱二八次舉緣邊間造長斜迭取爾乃詳
觀夫變化之理屈伸之形聳翩霍繹展轉盤榮或暇豫
安存或窮困側傾或接黨連興或孤據偏停于時觀者
莫不虛心竦踊咸側息而延佇或雷抃以大噱或戰悸
而不能語

又

文石為局金碧齊精隆中夷外理緻肌平

瑪瑙勒賦 有序

瑪瑙玉屬也出自西域文理交錯有似馬腦故其方人
因以名之或以繫頸或以飾勒余有斯勒美而賦之命
陳琳王粲並作辭曰

有奇章之珍物寄中山之崇岡稟金德之靈施舍白虎
之華章扇朔方之玄氣喜南離之焱陽歛中區之黃采
曜東夏之純蒼苞五色之明麗配皎日之流光命夫良
工是剖是鐫追形遂好從宜索便乃加砥礪刻方為圓

沈光內灼浮景外鮮繁文縞藻交采接連嘉鏤錫之盛
美感戎馬之首飾固茲物之攸宜信君子之所服爾乃
藉彼朱羈華勒用成駢居列蒼煥若羅星

北堂誤截數語蒙作陳琳

今合藝文御覽正之

車渠椀賦

有序

車渠玉屬也多纖理縟文生於西國其俗寶之
惟二儀之普育何萬物之殊形料珍怪之上美無茲椀
之獨靈苞華文之光麗發符采而揚榮理交錯以連屬

似將離而復并或若朝雲浮高山忽似飛鳥厲蒼天夫
其方者如矩圓者如規稠希不謬洪纖有宜

王琰賦

有崑山之玅璞產魯城之峻崕漱丹水之炎波蔭瑤樹
之玄枝包黃中之純氣抱虛靜而無為應九惠之淑懿
體五材之表儀

柳賦

有序

昔建安五年上與袁紹戰於官渡時余始植斯柳自彼

迄今十有五載矣感物傷懷乃作斯賦曰

伊中域之偉木兮瑰姿妙其可珍稟靈祇之篤施兮與
造化乎相因四時邁而代運兮去冬節而涉春彼庶卉
之未動兮固肇萌而先辰盛德遷而南移兮星鳥正而
司分應隆時而繁育兮揚翠葉之青純脩幹偃蹇以虹
指兮柔條阿那而蛇伸上扶疎而施散兮下交錯而龍
鱗在余年之二七植斯柳乎中庭始圍寸而高尺今連
拱而九成嗟日月之逝邁忽亹亹以遄征昔周遊而處

此今倏忽而弗形感遺物而懷故俛惆悵以傷情於是
曜靈次乎鶴首兮景風扇而增煖豐弘陰而博覆兮躬
愷悌而弗倦駟馬望而傾蓋兮行旅仰而廻瞻秉至德
而不伐兮豈簡卑而擇賤含精靈而寄生兮保休體之
豐衍惟尺斷而能植兮信永貞而可羨

槐賦

有序

文昌殿中槐樹盛暑之時余數遊其下美而賦之王粲
直登賢門小閣外亦有槐樹乃就使賦曰

有大邦之美樹惟令質之可嘉托靈根於豐壤被日月
之光華周長廊而開趾夾通門而駢羅承文昌之邃宇
望迎風之曲阿脩幹紛其璀璨綠葉萋而重陰上幽藹
而雲覆下莖立而擢心伊暮春之既替即首夏之初期
鴻鴈遊而送節凱風翔而迎時天清和而溫潤氣恬淡
以安治違隆暑而適體誰謂此之不怡

鶯賦

有序

堂前有籠鶯晨夜哀鳴悽若有懷憐而賦之曰怨羅人

之我困痛密網而在身顧窮悲而無告知時命之將泯
升華堂而進御奉明后之威神唯今日之僥倖得去死
而就生託幽籠以栖息厲清風而哀鳴

迷迭香賦

有序

余種迷迭于中庭嘉其揚條吐香馥有令芳乃為之賦
曰

生中堂以遊觀兮覽芳草之樹庭重紗葉於纖枝兮揚修
榦而結莖承靈露以潤根兮嘉日月而敷榮隨廻風以

搖動芳吐芬氣之穆清薄西夷之穢俗芳越萬里而來
征豈衆卉之足方芳信希世而特生

蔡伯喈女賦序

家公與蔡伯喈有管鮑之好乃命使者周近持玄璧于
匈奴贖其女還以妻屯田郡都命使者

詔

定正朔詔

孔子稱行夏之時乘殷之輅服周之冕樂則韶舞此聖

人集羣代之美事為後王制法也傳曰夏數為得天朕
承唐虞之美至於正朔當依虞夏故事若殊徽號異器
械制禮樂易服色用牲幣自當隨上德之數每四時之
季月服五十八日臘以丑牲用帛其飾節旄自當赤但
節幡黃耳其餘郊祀天地朝會四時之服宜如漢制宗
廟所服一如周禮

追崇孔子詔

昔仲尼資大聖之才懷帝王之器當衰周之末無受命

之運在魯衛之朝教化乎洙泗之上悽悽焉遑遑焉欲屈已以存道貶身以救世於時王公終莫能用之乃退考五代之禮修素王之事因魯史而制春秋就太師而正雅頌俾千載之後莫不宗其文以述作仰其聖以成謀咨可謂命世之大聖億載之師表者也遭天下大亂百祀墮壞舊居之廟毀而不修褒成之後絕而莫繼闕里不聞講頌之聲四時不覩蒸嘗之位斯豈所謂崇禮報功盛德百世必祀者哉其以議郎孔羨為宗聖侯邑

百戶奉孔子祀令魯郡修起舊廟置百戶吏卒以守衛之又於其外廣為屋室以居學者

為漢帝置守塚詔

朕承符運受終革命其敬事山陽公如舜之宗堯有始有卒傳之無窮前羣司奏處正朔欲使一皆從魏制意所不安其令山陽公於其國中正朔服色祭祀禮樂自如漢典又為武昭宣明帝置守塚各三百家

息兵詔

孫權殘害民物朕以寇不可長故分命猛將三道並征今征東諸軍與權黨呂範等水戰則斬首四萬獲船萬艘大司馬據守濡須其所禽獲亦以萬數中軍征南攻圍江陵左將軍張邵等舳艤直渡擊其南渚賊赴水溺死者數千人又為地道攻城城中外雀鼠不得出入此凡上肉耳而賊中癟氣疾病夾江塗地忍相染汚皆周武伐殷旋師孟津漢祖征隗囂還軍高平皆知天時而度賊情也且成湯解三面之網天下歸仁今開江陵之

圍以緩成歿之禽且休力役罷省繇畜養士民咸使安息

災異免策三公詔

災異之作以譴元首而歸過股肱豈禹湯臯已之義乎其令百官各虔厥職後有天地之眚勿復劾三公

拜日東郊詔

漢氏不拜日於東郊而旦夕常於殿下東面拜日煩穀似家人之事非事天郊神之道也

禁母后預政詔

夫婦人與政亂之本也自今以後羣臣不得奏事太后后族之家不得當輔政之任又不得橫受茅土之爵以此詔傳後世若有背違天下共誅之

改封諸王為縣王詔

先王建國隨時而制漢祖增秦所置郡至光武以天下損耗并省郡縣以今比之益不及焉其改封諸王皆為

縣王

鶴鳩集靈芝池詔

此詩人所謂汙澤也曹詩刺恭公遠君子而近小人今
豈有賢智之士處於下位者乎否則斯鳥何為而至其
博舉天下雋德茂才獨行君子以答曹人之刺

取士不限年詔

今之計考古之貢士也十室之邑必有忠信若限年然
後取士是呂尚周晉不顯於前世也其令郡國所選勿
拘老幼儒通經術吏達文法到皆試用有司糾故不以

實者

輕刑詔

近之不綏何遠之懷今事多而民少上下相弊以文法
百姓無所措其手足笞太山之哭者以為苛政甚於猛
虎吾備儒者之風服聖人之遺教豈可以目翫其辭行
違其誠者哉廣議輕刑以惠百姓

平准詔

今與孫驃騎和通商旅當日月而至而百賈偷利喜賤

其物平價又與其絹故官逆為平准耳宜豈少此物輩耶

禁復讎詔

喪亂以來兵革縱橫天下之人多相殘害者昔田橫殺
酈商之兄張步害伏湛之子漢氏二祖下詔使不得相
讎今兵戎始息宇內初定民之存者非流亡之孤則鋒
刃之餘當相親愛養老長幼自今以後宿有讎怨者皆
不得相讎

禁淫祀詔

先王制禮所以昭孝事祖大則郊社其次宗廟三辰五行名山大川非此族也不在祀典叔世衰亂崇信巫史至乃宮殿之內戶牖之間無不沃酌甚矣其惑也自今其敢設非祀之祭巫祝之言皆以執左道論著於令典

罷墓祭詔

先帝躬履節儉遺詔省約予以述父為孝臣以繫事為忠古不墓祭皆設於廟高陵上殿屋皆毀壞車馬還廐

衣服藏府以從先帝儉德之志

外國遣使奉獻詔

西戎即叙氐羌來王詩書美之頃者西域並歿塞內附其遣使者撫勞之

營壽陵詔

禮國君即位為椑存不忘亡也昔堯葬穀林通樹之禹
葬會稽農不易畝故葬於山林則合乎山林封樹之制
非上古也吾無取焉壽陵因山為體無為封樹無立寢

殷造園邑通神道夫葬也者藏也欲人之不得見也骨無痛痒之知冢非棲神之宅禮不墓祭欲存亡之不贊也為棺槨足以朽骨衣衾足以朽肉而已故吾營此丘墟不食之地欲使易代之後不知其處無施葦炭無藏金銀銅鐵一以瓦器合古塗車芻靈之義棺但漆際會三過飯含無以珠玉無施珠襦玉匣諸愚俗所為也季孫以璵璠斂孔子厯級而救之譬之暴骸中原宋公厚葬君子謂華元樂莒不臣以為棄君於惡漢文帝之不

發霸陵無求也光武之掘原陵封樹也霸陵之完功在
釋之原陵之掘畢在明帝是釋之忠以利君明帝愛以
害親也忠臣孝子宜思仲尼丘明釋之之言鑒華元樂
苦明帝之戒存於所以安君定親使魂靈萬載無危斯
則賢聖之忠孝矣自古及今未有不亡之國亦無不掘
之墓也喪亂以來漢氏諸陵無不發掘至乃燒取玉匣
金縷骸骨并盡是焚如之刑也豈不重痛哉禍繇乎厚
葬封樹桑霍為我戒不亦明乎其皇后及貴人以下不

隨王之國者有終沒皆葬澗西前又以表其處矣蓋舜
葬蒼梧二妃不從延陵葬子遠在羸博魂而有靈無不
之也一澗之間不足為遠若違今詔妄有所變改造施
吾為戮尸地下戮而重戮歿而重死臣子為蔑歿君父
不忠不孝使歿者有知將不福汝其以此詔藏之宗廟
副在尚書祕書三府

與羣臣詔

南方龍眼荔枝寧比西國蒲萄石密乎酢且不如中國

凡棗味莫若安邑御棗也

又

真定郡梨大若拳甘若蜜脆若凌可以解煩釋渴

又

前于闐王山習所上孔雀尾萬枚文彩五色以為金根
車蓋遙望曜人眼

又

新城孟太守道蜀豚羊雞鴦味皆淡故蜀人作食喜着

飴密

下頴川詔

頴川先帝所由起兵征伐也官渡之役四方瓦解遠近
顧望而此郡守義丁壯荷戈老弱負糧皆漢祖以秦中
為國本光武恃河內為王基今朕復於此登壇受禪天以
此郡翼成大魏

增封中年侯彰詔

先王之道庸勲親親並建母弟開國承家故能藩屏大

宗禦侮厭難彰前受命北伐清定朔土厥功茂焉增邑
五千并前萬戶

答臨淄侯植詔

植表欲祭先王操於北河之上博士鹿優韓
益等以為禮公子不得稱先君公子之子不
得祖諸侯謂不得立廟而祭也禮
又曰庶子不得祭宗廟遂詔答之

得月二十八日表知侯推情欲祭先王於河上覽省上
下悲傷感切將欲遣禮以紓侯敬恭之意會博士鹿優
等奏禮如此故寫以示開國承家顧迫禮制惟侯存心

與吾同之

答北海王來詔

黃初三年黃龍見鄴西漳水袁上書贊誦賜黃金十斤詔答

答唐叔歸禾東平獻頌斯皆骨肉贊美以彰懿親王研精墳典耽味道真文雅煥炳朕甚嘉之王其克慎明德以終令問

待楊彪客禮詔

夫先王制几杖之賜所以賓禮黃耆褒崇元老也答孔

光卓茂皆以淑德高年受茲嘉賜公故漢宰臣乃祖已
來世著名節年過七十行不踰矩可謂老成人矣所宜
寵異以章舊德其賜公延年杖及馮几謁請之日便使
杖入又可使著鹿皮冠

賜華歆詔

司徒國之儁老所與和陰陽理庶事也今大官重膳而
司徒蔬食甚無謂也特賜御衣及為其妻子男女皆作

衣服

論孫權詔

權前對浩周自陳不敢自遠樂委質長為外臣又前後辭旨頭尾擊地此鼠子自知不能保爾許地也又今與周書請以十二月遣子復欲遣孫長緒張子布隨子俱來彼二人皆權股肱心腹也又欲為子於京師求婦此權無異心之明效也

以陳羣為鎮軍司馬懿為撫軍詔

昔軒轅建四面之號周武稱予有亂臣十人斯蓋先聖

所以體國君民亮成天工多賢為貴也今內有公卿以
鎮京師外設牧伯以監四方至於元戎出征則軍中宜
有柱石之賢帥輜重所在又宜有鎮守之重臣然後車
駕可以周行天下無內外之慮吾今當征賊欲守之積
年其以尚書令潁鄉侯陳羣為鎮軍大將軍尚書僕射
西鄉侯司馬懿為撫軍大將軍若吾臨江授諸將方略
則撫軍當留許昌督後諸軍錄後臺文書事鎮軍隨車
駕當董督衆軍錄行尚書事皆假節鼓吹給中軍兵騎

六百人吾欲去江數里築宮室往來其中見賊可擊之形便出奇兵擊之若或未可則當舒六軍以遊獵饗賜軍士

詔王朗等三公

孫權欲遣子登入侍不至是時車駕徒許昌大興屯田欲舉軍東征朗上疏諫帝以成軍遂行臨江而還

詔王朗等三公

三世為將道家所忌窮兵黷武古有成戒况連年水旱士民捐耗而功作倍於前勞役兼於督進不滅賊退不

和民夫屋漏在上知之在下然迷而知反失道不遠過
而能改謂之不過今將休息棲備高山沈權九淵割除
擯棄投之畫外車駕當以今月中旬到譙淮漢衆軍亦
各還反不羈西歸矣

與王朗詔

黃初中中詔公卿舉獨行君子朗薦光祿大夫
楊彪且稱疾讓位於彪帝乃為彪置吏卒位
次三公詔

朗朗乃起

朕求賢於君而未得君乃翻然稱疾非徒不得賢更開

失賢之路增玉鉉之傾無乃居其室出其言不善見違
於君子乎君其勿有後辭

報王朗詔

朗為司空帝頗出游獵或
昏夜還宮朗上疏帝報之

覽表雖魏絳稱虞箴以諷晉悼相如陳猛獸以戒漢武
未足以喻方今二寇未殄將帥遠征故時入原塗以習
戎備至於夜還之戒已詔有司施行

答蔣濟詔

文帝即王位轉濟為相國長史及
踐阼出為東中郎將濟請留詔曰

高祖歌曰安得猛士守四方天下未寧要須良臣以鎮
邊境如其無事乃還嗚玉未為後也

與夏侯尚詔

文帝詔尚尚以示散騎常侍蔣濟濟言於帝
曰作威作福書之明誠天子無戲言古人所
慎於是追

收前詔

卿腹心重將特當任使恩施足歟惠愛可懷作威作福
殺人活人

報何夢詔

蓋禮賢親舊帝王之常務也以親則君有輔弼之勲焉
以賢則君有醇固之茂焉夫有陰德者必有陽報今君
疾雖未瘳神明聽之矣君其即安以順朕意

與于禁詔

昔漢高脫衣以衣韓信光武解綬以帶李忠誠皆人主
當時貴敬功勞今以遠遊冠與將軍

于禁復官詔

昔荀林父敗績於邲孟明喪師於殽秦晉不替使復其位其後晉獲狄土秦霸西戎區區小國猶尚若斯而况萬乘乎樊城之敗水災暴至非戰之咎其復禁等官

追贈夏侯尚詔

尚自少侍從盡誠竭節雖云異姓其猶骨肉是以人為腹心出當爪牙智略深敏謀謨過人不幸早殞命也柰何贈征南大將軍昌陵侯印綬

封朱靈鄃侯詔

將軍佐命先帝典兵歷年威過方郤功踰絳灌圖籍所
美何以加焉朕受天命帝有海內元功之將社稷之臣
皆朕所與同福共慶傳之無窮者也今封鄃侯富貴不
歸故鄉如夜行衣繡若平常所志願勿難言

與張邵詔

邵雖武將而愛樂儒士嘗薦同鄉
卑湛明經行修詔以湛為博士

昔祭遵為將奏置五經大夫居軍中與諸生雅歌投壺
今將軍外勒戎旅內存國朝朕嘉將軍之意今擢湛為

博士

答孟達詔

王雄為西部從事與達同僚及為涿郡太
守達表薦之詔報達雄後歷幽州刺史

答蕭何薦韓信鄧禹進吳漢惟賢知賢也雄有膽智技
能文武之姿吾宿知之今便以叅散騎之選方使少在
吾門下知指歸便大用之矣天下之士欲使皆先歷散
騎然後出據州郡是吾本意也

手報司馬芝詔

芝為河南尹曹洪乳母與臨汾公主侍者共祀無潤神繫獄卞太后遣黃門傳令芝不通

輒勑洛陽獄考竟芝
上疏謝罪帝報之

省表明卿至心欲奉詔書以權行事是也此乃卿奉詔之意何謝之有後黃門復往慎勿通也

封張遼李典子為關內侯詔

合肥之役遼典以步卒八百破賊十萬自古用兵未之有也使賊至今奪氣可謂國之爪牙矣其分遼典邑各

百戶賜一子爵關內侯

以李通子基為中郎將詔

昔袁紹之難自許蔡以南人懷異心通秉義不顧使攜貳率服朕甚嘉之不幸早薨子基雖已襲爵未足酬其庸勲基兄緒前屯樊城又有功世篤其勞其以基為奉義中郎將緒平虜中郎將以寵異焉

賜張既子翁歸為關內侯詔

答荀桓子立勲翟土晉侯賞以千室之邑馮異輸力漢朝光武封其二子故涼州刺史張既能容民畜衆使羣

羌歸土可謂國之良臣不幸薨隕朕甚愍之其賜小子
翁歸爵關內侯

賜溫恢子生爵關內侯詔

恢有柱石之質服事先帝功勤明著及為朕執事忠於
王室教授之以萬里之任任之以一方之事如何不遂
吾甚愍之賜恢子生爵關內侯

以張登為大官令詔

登忠義彰著在職功勤名位雖卑直亮宜顯褒膳近在

當得此吏今以登為大官令

制詔三公

下並元年

上古之始有君也必崇恩化以美風俗然百姓順教而
刑辟厝焉今朕承帝王之緒其以延康元年為黃初元
年議改正朔易服色殊徽號同律度量承土行大赦天
下自殊死以下諸不當得赦皆赦除之

服色如奏詔

服色如所奏其餘宜如虞承唐但臘日用丑耳此亦聖

人之制也

改雒為洛詔

火行也火忌水故洛去水而加佳魏於行次為土土水之壯也水得土而乃流土得水而柔故除佳加水變雒為洛

曹植貶封安鄉侯詔

黃初二年監國謁者灌均
希旨奏植醉酒悖慢劫脅

使者有司請治罪帝以
太后故貶爵安鄉侯

植朕之同母弟朕於天下無所不容而况植乎骨肉之

親舍而不誅其改封植

誅鮑勛詔

勛為治書執法帝從壽春還屯陳留郡界大守孫邕邪行不從正道軍營令史劉曜欲推之勛以塹壘未成解止曜有罪勛奏一遣而曜密表勛私解邕事詔曰

勛指鹿作馬收付廷尉

蔣濟復為東中郎將詔

卿兼資文武志節忼惄常有超越江湖吞呉會之志故

復授將率之任

賜桓階詔

桓階別傳階為趙郡太守時俸盡食醬踰上聞數戲曰卿家作醬頗多成

否詔

昔子文清儉朝不謀夕而有脯糧之秩宣子守約軍食
魚飧而有加梁之賜豈況光光大魏富有四海棟宇大
臣而有蔬食非吾所以禮賢之意也其賜射鹿師二人
并給媒弩字一作梁

劉靖遷廬江太守詔

卿父昔為彼州今卿復據此郡可謂克負荷者也

張既為涼州詔

昔賈復請擊鄖賊光武笑曰執金吾擊鄖吾復何憂卿謀略過人今則其時以便宜從事勿復先請

與張既詔

卿踰河厯險以勞擊逸以寡勝衆功過南仲勤踰吉甫此勲非但破胡乃永寧河右使吾長無西顧之念矣

褒田豫詔

魏略豫為邠州刺史祥卑素利等感懷密遺金三十斤豫張袖受之胡去

悉皆付外

詔褒之

昔魏絳開懷以納戎賂今卿舉袖以受狄金朕甚嘉焉

追謚杜畿詔

昔冥勤其官而水死稷勤百穀而山死故尚書僕射杜畿於孟津試船遂至覆沒忠之至也朕甚愍焉追贈大僕謚曰戴侯

與羣臣

新城孟太守道蜀肫羊雞鴉味皆淡故蜀人作食喜着飴密

又

蓋聞千鍾百觚堯舜之飲也惟酒無量仲尼之能也姐
旦酒殽不徹故能制禮作樂漢高婆娑巨醉故能斬蛇
鞠旅

詔司馬懿

文帝以懿為撫軍大將軍車駕自廣
陵還洛陽詔懿於是帝留鎮許昌

吾東撫軍當總西事吾西撫軍當總東事

令

向化手令

蜀將孟達率衆降武都氐王
率種人內附王自手筆作令

吾前遣使宣國威靈而達即來吾惟春秋褒儀父即封
拜達使還領新城太守近復有扶老携幼首向王化者
吾聞夙沙之民自縛其君以歸神農幽國之衆襁負其
子而入豐鎬斯豈驅略迫脅之所致哉乃風化動其情
而仁義感其衷歡心內發使之然也以此而推西南將
萬里無外權備將與誰守歟乎

答許芝上代漢圖識令

昔周文三分天下有其二以服事殷仲尼歎其至德公
旦履天子之籍聽天下之斷終然復子明辟書美其人
吾雖德不及二聖敢忘高山景行之義哉若夫唐堯舜
禹之蹟皆以聖質茂德處之故能上和靈祗下寧萬姓
流稱今日今吾德至薄也人至鄙也遭遇際會幸承先
王餘業恩未被四海澤未及天下雖傾倉竭府以振魏
國百姓猶寒者未盡煖饑者未盡飽夙夜憂懼弗敢遑
寧庶欲保全髮齒長守今日以沒於地以全魏國下見

先王以塞負荷之責望狹志局守此而已雖屢蒙祥瑞當之戰惶五色無主若芝之言豈所聞乎心慄手悼書不成字辭不宣口吾間作詩曰喪亂悠悠過紀白骨縱橫萬里哀哀下民靡恃吾將佐時整理復予明辟致仕庶欲守此辭以自終卒不虛言也宜宣示遠近使昭赤心

答辛毗等令

下四方以明孤歎心是也至於覽餘辭豈余所謂哉寧

所堪哉諸卿指論未若孤自料之審也夫虛談謬稱鄙
薄所弗當也且聞比來東征經郡縣厯屯田百姓面有
饑色衣或短褐不完臯皆在孤是以上慙衆瑞下愧士
民由斯言之德尚未堪偏王何言帝者也宜止息此議
無重吾不德使逝之後不愧後之君子

答司馬懿等令

世之所不足者道義也所有餘者苟妄也常人之性賤
所不足貴所有餘故曰不患無位患所以立孤雖寡德

庶自免於常人之貴夫石可破而不可奪堅丹可磨而不可奪赤丹石微物尚保斯質况吾託士人之末列曾受教於君子哉且於陵仲子以仁為富柏成子高以義為貴鮑焦感子貢之言棄其蔬而槁歿薪者譏季札失辭皆委重而弗視吾獨何人昔周武大聖也使叔旦盟膠鬲於四內使召公約微子於其頭故伯夷叔齊相與笑之曰答神農氏之有天下不以人之壞自成不以人之卑自高以為周之伐殷以恭也吾德非周武而義慙

夷齊庶欲遠苟妄之失道立丹石之不奪邁於陵之所富蹈柏成之所貴執鮑焦之貞至遵薪者之清節故曰三軍可奪帥匹夫不可奪志吾之斯志豈可奪哉

答劉廙劉曄等令

犁牛之駁似虎莠之幼似禾事有似是而非者今日是已覩斯言事良重吾不德于是尚書僕射宣告官寮咸使聞知

讓禪令

當奉還璽綬為讓章吾豈奉此詔承此貺邪笞堯讓天下與許由子州支甫舜亦讓于善卷石戶之農北人無擇或退而耕頽之陽或辭以幽憂之疾或達入山林莫知其處或攜子入海終身不反或以為辱自投深淵且顏慄懼太樸之不完守知足之明分王子搜樂丹穴之潛處被重而不出柳下惠不以三公之貴易其介曾參不以晉楚之富易其仁斯九士者咸高節而尚義輕富而賤貴故書名千載於今稱焉求仁得仁仁豈在遠孤

獨何為不如哉義有蹈東海而逝不奉漢朝之詔也亟
為上章還璽綏宣之天下使咸聞焉

讓禪第二令

昔柏成子高辭夏禹而匿塋顏閩辭魯幣而遠跡夫以
王者之重諸侯之貴而二子忽之何則其節高也故列
士徇榮名義夫高貞介雖蔬食瓢飲樂在其中是以仲
尼師王駘而子產嘉申徒今諸卿皆孤股肱腹心足以
明孤而今咸若斯則諸卿遊於形骸之內而孤求為形

骸之外其不相知未足多怪亟為上章還璽綬勿復紛紛也

讓禪第三令

夫古聖王之治也至德合乾坤惠澤均造化禮教優乎
昆蟲仁恩洽乎草木日月所照戴天履地含氣有生之
類靡不被服清風沐浴玄德是以金革不起苛慝不作
風雨應節禎祥觸類而見今百姓寒者未煖饑者未飽
鰥者未室寡者未嫁權備尚存未可舞以干戚方將整

以齊斧戎役未息於外士民未安于內耳未聞康哉之
歌目未覩擊壤之戲嬰兒未可託於高巢餘糧未可以
宿於田畝人事未備至於此也夜未曜景星治未通真
人河未出良馬山未出象車蓂莢未植階庭蓬蓽未生
庖厨王母未獻白環渠搜未見珍裘靈瑞未效又如彼
也笞東戶季子容成大庭軒轅赫胥之君咸得以此就
功勒名今諸卿獨不可少假孤精心竭慮以和天人以
格至理使彼衆事備羣瑞效然後安乃議此乎何遽相

愧相迫之如是也速為讓章上還璽綬無重吾不德也

答劉虞等令

天下重器王者正統以聖德當之猶有懼心吾何人哉
且公卿未至乏主斯豈小事且宜以待固讓之後乃當
更議其可耳

答蘇林等令

凡斯皆宜聖德故曰苟非其人道不虛行天瑞雖彰須
德而光吾德薄之人胡足以當之今讓冀見聽許外內

咸使聞知

答華歆等令

以德則孤不足以時則戎虜未滅若以羣賢之靈得保
首領終君魏國於孤足矣若孤者胡足以辱四海至乎
天瑞人事皆先王聖德遺慶孤何有焉是以未敢聞命

又答相國歆等令

昔者大舜飯糗茹草將終身焉斯則孤之前志也及至
承堯禪被珍乘妻二女若固有之斯則順天命也羣公

卿士誠以天命不可拒民望不可違孤亦曷以辭焉

薄稅令

關津所以通商旅池苑所以禦災荒設禁重稅非所以
便民其除池禁之禁輕關津之稅皆復什一

復譙租稅令

先王皆樂其所生禮不忘其本譙霸王之邦真人本出
其復譙租稅二年

以鄭稱為武德傳令

龍淵太阿出昆吾之金和氏之璧由井里之田礪之以
砥礪錯之以他山故能致連城之價為命世之寶學亦
人之砥礪也稱篤學大儒勉以經學輔侯宜旦夕入侍
曜明其志

廣詢令

軒轅有明臺之議放勛有衢室之間皆所以廣詢於下
也百官有司其務以職盡規諫將率陳軍法朝士明制
度牧守申政事縉紳考六藝吾將兼覽焉

問雍州刺史張既令

蘇則為金城太守西平麴演叛則勒兵討之
演乞降文帝時襲王位令問既既答之加則
護羌校尉賜爵闕內侯後演

復結旁郡為亂則誘斬之

試守金城太守蘇則既有綏民平夷之功聞又出軍西
定湟中為河西作聲勢吾甚嘉之則之功效為可加爵
邑未邪封爵重事故以問卿密白意且勿宣露也

拜毛玠等子男為郎中令

下並元年

故尚書僕射毛玠奉常王脩涼茂郎中令袁渙少府謝

龜萬潛中尉徐奕國淵等皆忠直在朝履蹈仁義並早
即世而子孫陵遲惻然愍之其皆拜子男為郎中

收斂戰亡士卒令

諸將征伐士卒死亡者或未收斂吾甚哀之其告郡國
給櫬牘殯斂送致其家官為設祭

策

追封鄧公策

惟黃初二年八月丙午皇帝曰咨爾鄧哀侯冲昔皇天

鍾美於爾躬俾聰哲之才成於弱年當永享顯祚克成厥終如何不祿早世天昏朕承天序享有四海並建親親以藩王室惟爾不逮斯榮且葬禮未備追悼之懷愴然攸傷今遷葬于高陵使使持節兼謁者僕射郎中陳承追賜號曰鄧公祠以大牢魂而有靈休茲寵榮

謚龐德策

昔先軫喪元王蠋絕脰隕身徇節前代美之惟侯式昭果毅蹈難成名聲溢當時義高在昔寡人愍焉謚曰壯

亥

策孫權九錫文

蓋聖王之法以德詔爵以功制祿勞大者祿厚德盛者禮豐故叔旦有夾輔之勲太公有鷹揚之功並啟土宇并受備物所以表章元功殊異賢哲也近漢高祖受命之初分裂膏腴以王八姓斯則前世之懿事後王之元龜也朕以不德承運革命君臨萬國秉統天機思齊先代坐而待旦惟君天資忠亮命世作佐深覩厯數達見

廢興遠遣行人浮於潛漢望風影附抗疏稱藩兼納纖
繩南方之貢普遣諸將來還本朝忠肅內發欵誠外昭
信著金石義蓋山河朕甚嘉焉今封君為吳王使使持
節太常高平侯貞授君璽綬策書金虎符第一至第五
左竹使符第一至第十以大將軍使持節督交州領荆
州牧事錫君青土苴以白茅對揚朕命以尹東夏其上
故驃騎將軍南昌侯印綬符策今又加君九錫其敬聽
後命以君綏安東南綱紀江外民夷安業無或攜貳是

用錫君大輶戎輶各一元牡二駟君務財勸農倉庫盈
積是用錫君袞冕之服赤舄副焉君化民以德禮教興
行是用錫君軒縣之樂君宣導休風懷柔百越是用錫
君朱戶以居君運其才謀官方任賢是用錫君納陛以
登君忠勇並奮清除姦慝是用錫君虎賁之士百人君
振威陵邁宣力荆南梟滅凶醜臯人斯得是用錫君鉞
鉞各一君文和於內武信於外是用錫君彤弓一彤矢
百旅弓十旅矢千君以忠肅為基恭勤為德是用錫君

秬鬯一卣圭瓚副焉欽哉敬敷訓典以服朕命以勗相我國家永終爾顯烈

冊孫登為東中郎封侯策

蓋河洛寫天意符識述聖心昭晰著明與天談也故易曰河出圖洛出書聖人則之孫將軍歸心國朝忠亮之節同功佐命而其子當為魏將軍著在圖識猶漢光武受命李氏為輔王梁孫咸並見符緯也斯乃皇天啟祐大魏永令孫氏仍世為佐其以登為東中郎將封縣侯

萬戶昔周嘉公旦祚流七胤漢禮蕭何一門十侯今孫將軍亦當如斯若夫長平之榮安豐之寵方斯蔑如

教

答卞蘭教

賦者言事類之因附也頌者美盛德之形容也故作者不虛其辭受者必當其實蘭此賦豈吾實哉笞吾丘壽王一陳寶鼎何武等徒以歌頌猶受金帛之賜蘭事雖不諒義足嘉也今賜牛一頭

表

讓禪表

皇帝陛下奉被今月乙卯璽書伏聽冊命五內驚震精
爽散越不知所處臣前上還相位退守藩國聖恩聽許
臣雖無古人量德度身自定之志保已存性實其私願
不寤陛下猥損過謬之命發不世之詔以加無德之臣
且聞堯禪重華舉其克諧之德舜授文命采其齊聖之
美猶下咨四嶽上觀璿璣今臣德非虞夏行非二君而

承厯數之諮應選授之命內自揆撫無德以稱且許由
匹夫猶拒帝位善卷布衣而逆虞詔臣雖鄙蔽敢忘守
節以當大命不勝至願謹拜章陳情使行相國永壽少
府糞土臣毛宗奏并上璽綬

讓禪第二表

奉今月戊戌璽書重被聖命伏聽冊告肝膽戰悸不知
所措天下神器禪代重事故堯將禪舜納于大麓舜之
命禹玄圭告功烈風不迷九州攸平詢事考言然後乃

命而猶執謙讓于德不嗣况臣頑固質非二聖乃應天
統受終明詔敢守微節歸志箕山不勝大願謹拜表陳
情使并奉上璽綬

讓禪第三表

臣聞舜有賓於四門之勲乃受禪於陶唐禹有存國七
百之功乃承祿於有虞臣以蒙蔽德非二聖猥當天統
不敢聞命敢屢抗疏略陳私願庶章通紫庭得全微節
情達宸極永守本志而音重復銜命申制詔臣臣實戰

惕不發璽書而音迫于嚴詔不敢復命願陛下馳傳騁
驛召音還臺不勝至誠

書

與吳質書

質為朝歌長遷元城令太祖西
征太子南在孟津小城與質書

五月二十八日丕白季重無恙塗路雖局官守有限願
言之懷良不可任足下所治僻左書問致簡益用增勞
每念昔日南皮之游誠不可忘既妙思六經逍遙百氏

彈碁間設終以六博高談娛心哀箏順耳馳騖北場旅
食南館浮甘瓜於清泉沈朱李於寒水白日既匿繼以
朗月同乘並載以游後園輿輪徐動賓從無聲清風夜
起悲笳微吟樂徃哀來愴然傷懷余顧而言斯樂難常
足下之徒咸以為然今果分別各在一方元瑜長逝化
為異物每一念至何時可言方今蕤賓紀時景風扇物
天意和暖衆果具繁時駕而遊北遵河曲從者鳴笳以
啟路文學託乘於後車節同時異物是人非我勞如何

今遣騎到鄴故使枉道相過行矣自愛不白

又與吳質書

魏志云阮瑀以十七歲卒徐幹陳琳應瑒劉楨以二十二年卒質時為元城令太子與書

二月三日不白歲月易得別來行復四年三年不見東山猶歎其遠况又過之思何可支雖書疏往返未足解其勞結笞年疾疫親故多離其災徐陳應劉一時俱逝痛可言邪昔日游處行則連輿止則接席何曾須臾相失每至觴酌流行絲竹並奏酒酣耳熱仰而賦詩當此

之時忽然不自知樂也謂百年已分長共相保何圖數年之間零落略盡言之傷心頃撰其遺文都為一集觀其姓名已為鬼錄追思昔遊猶在心目而此諸子化為糞壤可復道哉觀古今文人類皆不護細行鮮能以名節自立而偉長獨懷文抱質恬淡寡欲有箕山之志可謂彬彬君子矣著中論二十餘篇成一家之業辭義典雅足傳於後此子為不朽矣德璉常斐然有述作意其才學足以著書美志不遂良可痛惜間者歷覽諸子之

文對之拭淚既痛逝者行自念也孔璋章表殊健微為繁富公幹有逸氣但未道耳至其五言詩妙絕當時元瑜書記翩翩致足樂也仲宣獨自善於辭賦惜其體弱不足起其文至於所善古人無以遠過也答伯牙絕絃於鍾期仲尼覆醢於子路愍知音之難遇傷門人之莫逮也諸子但為未及古人自一時之儕也今之存者已不逮矣後生可畏來者難誣然吾與足下不及見也行年已長大所懷萬端時有所慮至乃通夕不瞑何時復

類答曰已成老翁但未白頭耳光武言年已三十在軍
十年所更非一吾德雖不及年與之齊以犬羊之質服
虎豹之文無衆星之明假日月之光動見瞻觀何時易
邪恐永不復得為昔日遊也少壯真當努力年一過往
何可攀援古人思秉燭夜游良有以也頃何以自娛頗
復有所造述否東望於邑裁書叙心丕白

又與吳質書

初曹真曹休與質等俱在渤海游處及太子
即王位休真以宗親並受封爵出為列將而

質故為長史王顧質有
望故稱二人以慰之

南皮之游存者三人烈祖龍飛或將或侯今惟吾子棲
遲下仕從我游處獨不及門併罄壘恥能無懷愧路不
云遠今復相聞

與鍾繇謝玉琰書

太祖征漢中太子在孟津聞繇有玉琰密使
臨淄侯因人說之繇遂送馬太子與繇書

丕白良玉比德君子珪璋見美詩人晉之垂棘魯之璠
璵宋之結綠楚之和璞價越萬金貴重都城有稱疇昔

流聲將來是以垂棘出晉虞號雙禽和璧入秦相如抗
節竊見玉書稱美玉白如截肪黑譬純漆赤擬雞冠黃
侔蒸栗側聞斯語未覩厥狀雖德非君子義無詩人高
山景行私所慕仰然四寶邈焉已遠秦漢未聞有良比
也求之曠年不遇厥真私願不果饑渴未副近日南陽
宗惠叔稱君侯笞有美玦聞之驚喜笑與抃會當自白
書恐傳言未審是以令舍弟子建因荀仲茂時從容喻
鄙旨乃不忽遺厚見周稱鄴騎既到寶玦初至捧匣跪

發五內震駭繩窮画開爛然滿目猥以蒙鄙之姿得覩
希世之寶不煩一介之使不損連城之價既有秦昭章
臺之觀而無蘭生詭奪之誑嘉貺益腆敢不欽承謹奉
賦一篇以讚揚麗質丕白

與鍾繇五熟金書

繇為相國以五熟鴟範因太子鑄之金成太子與繇書

昔有黃三鼎周之九寶咸以一體使調一味豈若斯金
五味時芳蓋鼎之烹飪以饗上帝以養聖賢昭德祈福

莫斯之美故非大人莫之能造故非斯器莫宜盛德今
之嘉金有逾茲美夫周之尸臣宋之考父衛之孔悝晉
之魏顆彼四臣者並以功德勒名鐘鼎今執事寅亮大
魏以隆聖化堂堂之德於斯為盛誠太常之所宜銘彝
器之所宜勒故作斯銘勒之金口庶可贊揚洪美垂之
不朽

與鍾繇九日送菊書

歲往月來忽逢九月九日九為陽數而日月並應俗嘉

其名以為宜於長久故以享宴高會是月律中無射言
羣木百草無有射地而生惟芳菊紛然獨榮非夫含乾
坤之純和體芬芳之淑氣孰能如此故屈平悲冉冉之
將老思餐秋菊之落英輔體延年莫斯之貴謹奉一束
以助彭祖之術

與鍾繇書

荀閼字仲茂為太子文學據時有甲乙疑論
閼與鍾繇王朗袁渙議各不同文帝與繇書

袁王國士更為唇齒荀閼勁悍往來銳師真君侯之勍

敵左右之深憂也

答鍾繇書

孫權稱臣太子書報繇
繇答書太子又答之

得報知喜南方至於荀公之清談孫權之斌媚執書嘔
嘔不能離手若權復黠當折以汝南許邵月旦之評權
優游二國俯仰苟許亦已足矣

答繁欽書

披書歡笑不能自勝奇才妙伎何其善也頃守官王孫

世有女曰琰年始九歲夢與神通寤而悲吟哀聲激切
涉厯六載于今十五近者督將具以狀聞是日博延衆
賢遂奏名倡曲極數彈歡情未逞乃令從官引內世女
須臾而至厥狀甚美素顏玄髮皓齒丹唇詳而問之云
善歌舞於是提袂徐進揚蛾微眺芳聲清激逸足橫集
然後脩容飾粧改曲變度斯可謂聲協鐘石氣應風律
今之妙舞莫巧於絳樹清歌莫激於宋臘豈能上亂靈
祇下變庶特漂悠風雲橫厲無方若斯也哉固非車子

唉嘆長吟所能逮也吾鍊色知聲雅應此選謹卜良日
納之閑房

喝劉楨書

太子初賜楨廓落帶其後師父欲借取為像因書喝楨楨答之

夫物因人為貴故在賤者之子不御至尊之側今雖取
之勿嫌其不反也

答友人書

御覽作答劉先主然意義絕不相贊姑問姓名

獲累紙之命兼美之貺他既備善雙鈞尤妙前後之惠

非賢兄之貢則執事之貽也來若川流聚成山積其充
匱笥頓府藏者固已無數矣

與吳監書

中國珍果甚多且復為說蒲萄當其朱夏涉秋尚有餘
暑醉酒宿醒掩露而食甘而不餽脆而不酸冷而不寒
味長汁多除煩解倦又釀以為酒甘於麴蘖善醉而易
醒道之固以流漾咽嗌况親食之邪南方有橘酢正裂
人牙時有甜耳即遠方之果寧有匹者乎

與羣臣論蜀錦書

前後每得蜀錦殊不相比適可訝而鮮卑尚復不愛也
自吾所織如意虎頭連璧錦亦有金薄蜀薄來至洛邑
皆下惡是為下工之物皆有虛名

與羣臣論被服書

三世長者知被服五世長者知飲食此言被服飲食難
曉也夫珍玩必中國夏則纊總綃總其白如雪冬則羅
紝綺縠衣疊鮮文未聞衣服葛也

與朝臣論秔稻書

江表惟長沙名有好米何得比新城秔稻邪上風吹之
五里聞香

報崔琰書

昨奉嘉命惠示雅數欲使燔翳捐褶翳已壞矣褶亦去
焉後有此比蒙復誨諸

與曹洪書

今魯罪兼苗桀惡稔厲莽縱使宋翟妙機械之巧田單

騁奔牛之誑孫吳勒八陣之變猶無益也

與王朗書

帝初在東宮疫癘大起時人雕傷帝深感歎
與大理王朗書故論撰所著典論詩賦百餘
篇集諸儒於肅城門內
講論大義侃侃無倦

人生有七尺之形死為一棺之土惟立德揚名可以不
朽其次莫如著篇籍疫癘數起士人雕落余獨何人能
全其壽

又

宋仲子之子與魏諷謀
反伏誅太子答朗書

昔石厚與州吁游父碏知其與亂韓子昵田蘇穆子知其好仁故君子游必有方居必就士誠有以也嗟乎宋忠無石子先識之明老罹此禍今雖欲願行滅親之誅立純臣之節尚可得邪

又

孫權重遣使稱臣奉貢明珠百筐黃金千鎰馴象二頭或牝或牡擾禽鸚鵡其他珍玩盈舟溢航千類萬品

丕白不愛江漢之珠而愛巴蜀之鉤此言難得之貴寶
不若易有之賤物

又

蚤虱雖細慮於安寢鼴鼠至微猶毀郊牛也

與劉曄書

劉生帽裁兩段製微不長有似里父之服今帽所當著

與諸將書

劉備既孤老智窮勢極正使欲與父爭則諸將軍便當就穴中將取之爾

報吳王孫權書

權上書說劉備支黨四萬人馬二三千匹出
秭歸請往掃撲以克捷為效帝報之

答隗囂之斬禍發拘邑子陽之禽變起扞關將軍其亢
厲威武勉蹈奇功以稱吾意

又報孫權書

前使于禁郭及夫所道吾纖驪馬本欲使禁自致之念

將軍儻欲速得今故以付徐奉往此二馬朕之常所自乘甚調良善走數萬匹之極選者乘之真可樂也中國雖饒馬其知名絕足亦時有之耳

又

權以使聘魏具上破備獲印綬及首級所得土地并表將吏功勤宜加爵賞文帝報使致
驪子表明光鎧駢馬又以素書
所作典論及詩賦與權詔答之

老虜邊窟越險深入曠日持久內迫罷弊外困智力故見身於雞頭分兵擬西陵其計不過謂可轉是前迹以

搖動江東根未著地摧折其支雖未剗備五藏使身首
分離其所降誅亦足使虜部衆光懼箇吳漢先燒荆門
後發夷陵而子陽無所逃其死來歟始襲略陽文叔喜
之而知隗囂無所施其巧今討此虜正似其事將軍勉
建方略務全獨克

又報孫權書

權外託事魏而誠心不欺魏遣侍中辛毗尚
書桓階往與盟誓并徵任子登辭讓不受魏
乃命曹休等數道攻吳時揚越蠻夷多未平
復內難未弭權卑辭上書求自解厲若必不

見置當奉還土地
寄命交州帝報之

君生於擾攘之際本有從橫之志降身奉國以享茲祚
自君策名已來貢獻盈路討備之功國朝仰成理而掘
之古人之所恥朕之與君大義已定豈樂勞師遠臨江
漢廊廟之議王者所不得專三公上君過失皆有本末
朕以不明雖有曾母投杼之疑猶冀言者不信以為國
福故先遣使者犒勞又遣尚書侍中踐修前言以定任
子君遂設辭不欲使進議者怪之又前都尉浩周勸君

遣子乃實朝臣交謀以此卜君君果有辭外引隗囂遣
子不終內喻竇融守忠而已世殊時異人各有心浩周
之還口陳指麾益令議者發明衆嫌終始之本無所據
杖故遂俛仰從羣臣議今省上事欵誠深至心用慨然
悽愴動容即日下詔勅諸軍但深溝高壘不得妄進若
君必效忠節以解疑議登身朝到夕召其還此言之誠
有如大江

與孟達書

延康元年達率部曲四千餘家歸魏時文帝初即王位既宿知有達聞其來甚悅逆與達

書達至拜散騎常侍
領新城太守後反誅

近日有命未足達旨何者答伊摯背商而歸周百里去虞而入秦樂毅感鶴夷以蟬蛻王遵識逆順以去就皆審廢興之符效知成敗之必然故丹青畫其形容良史載其功勳聞卿姿度純茂器量優絕當聘能明時收名傳記今者巍然濯鱗清流甚相嘉樂虛心西望依依若舊下筆屬辭歡心從之答虞卿入趙再見取相陳平就

漢一覲參乘孤今於卿情過於往故致所御馬物以昭忠愛

又與孟達書

今者海內清定萬里一統三垂無邊塵之警中夏無狗吠之虞以是弛罔闊禁與世無疑保官空虛初無資任卿來相就當明孤意慎勿令家人縞紛道路以親駭疎也若卿欲來相見且當先安部曲有所保固然後徐徐輕騎來東

報吳王孫權書

知已選擇見船最大樟林者六艘受五百石從沔水送
付樊口

又

今因趙咨致文馬一匹白驥子裘一領

送劍書

僕有劍一枚明珠標首藍玉飾靶用給左右以除妖氛

序

典論自序

初平之元董卓殺主鴻后蕩覆王室是時四海既困中
平之政兼惡卓之凶逆家家思亂人人自危山東牧守
咸以春秋之義衛人討州吁于濮言人人皆得討賊於
是大興義兵名豪大俠富室強族飄揚雲會萬里相赴
兗豫之師戰於滎陽河內之甲軍于孟津卓遂遷大駕
西都長安而山東大者連郡國中者嬰城邑小者聚阡
陌以還相吞併會黃巾盛於海嶽山寇暴於并冀乘勝

轉攻席卷而南鄉邑望烟而奔城郭覩塵而潰百姓死
亡暴骨如莽予時年五歲上以世方擾亂教予學射六
歲而知射又教余騎馬八歲而知騎射矣以時之多故
每征余常從建安初上南征荊州至宛張繡降旬日而
反亡兄孝廉子修從兄安民遇害時余年十歲乘馬得
脫夫文武之道各隨時而用生于中平之季長于戎旅
之間是以少好弓馬于今不衰遂禽輒十里馳射常百
步日多體健心每不厭建安十年始定冀州滅貊貢良

弓燕代獻名馬時歲之暮春勾芒司節和風扇物弓燥
手柔草淺獸肥與族兄子丹獵于鄴西終日手獲麋鹿
九雉兔三十後軍南征次曲蠡尚書令荀或奉使犒軍
見余談論之末或言聞君善左右射此實難能余言執
事未覩夫項發口縱俯馬蹄而仰月支也或喜笑曰乃
爾余曰埒有常徑的有常所雖每發輒中非至妙也若
馳平原赴豐草要狡獸截輕禽使弓不虛彎所中必洞
斯則妙矣時軍祭酒張京在坐顧或拊手曰善予又學

擊劍閱師多矣四方之法各異唯京師為善桓靈之間有虎賁王越善斯術稱於京師河南史阿言昔與越遊具得其法余從阿學之精熟嘗與平虜將軍劉勲奮威將軍鄧展等共飲宿間展善有手臂曉五兵又稱其能空手入白刃余與論劍良久謂言將軍法非也余顧嘗好之又得善術因求與余對時酒酣耳熱方食竿蓆便以為杖下殿數丈三中其臂左右大笑展意不平求更為之余言吾法急屬難相中而故齊臂耳展言願復一

交余知其欲突以取交中也因偽深進展果尋前余却
脚勦正截其額坐中驚視余還坐笑曰答陽慶使淳于
意去其故方更授以祕術今余亦願鄧將軍捐棄故伎
更受要道也一坐盡歡夫事不可自謂已長余少曉持
複自謂無對俗名雙戟為坐鐵室鑲楯為蔽木戶後從
陳國袁敏學以單攻複每為若神對家不知所出告曰
若逢敏於狹路真決耳余於他戲弄之事少所喜唯彈
棋略盡其巧少為之賦昔京師先工有馬合鄉侯東方

安世張公子常恨不得與彼數子者對上雅好詩書文籍雖在軍旅手不釋卷每每定省從容常言人少好學則思專長則善忘長大而能勤學者唯吾與袁伯業耳余是以少誦詩論及長而備歷五經四部史漢諸子百家之言靡不畢覽

繁欽集序

上西征余守譙繁欽從時薛訪車子能喚囁與笳同音欽牋還與余盛歎之雖過其實而其文甚麗

陳琳集序

上平定漢中族父都護還書與余盛稱彼方土地形勢
觀其辭如陳琳所敘為也

建安諸序

維建安二十四年二月丙午魏太子丕造刀三其二曰
含章彩似丹霞 又曰造百辟寶劍三其二曰流彩虹
李尤字伯宗少有文章賈逵薦尤有相如揚雄之風拜
蘭臺令史與劉楨等共撰漢記

王粲長於詞賦陳琳阮瑀之文章書記今之俊也

建安二十四年二月壬午魏太子丕造百辟寶劍長四
尺二寸選茲良金令彼國工精而鍊之至於百辟淬以
清漳礪以礮諸光似流星名曰飛景

余好擊劍命彼國工以為寶器飾以文玉表以通犀

余好擊劍善以短乘長精而鍊之其始成也五色駭鑪
巨橐自鼓雲物髮鬚飛鳥翔舞

昔周魯寶雍狐之戟屈盧之矛孤父之戈徐氏匕首凡

斯皆上世名器君子雖有文事必有武備矣

魏太子造百辟匕首三其一理似堅冰名曰清剛其二曜似朝日名曰揚文其三狀似龍文名曰龍鱗

昔者周魯寶赤刀孟勞

丕造百辟寶刀其一文似靈龜名曰靈寶其二彩似丹霞名曰含章其三鋒似崩霜刀身劒鍊名曰素質又作露陌刀一名龍鱗

酒以成禮過則敗德孝靈之末朝政墮廢官司並湎于

酒貴戚尤甚流俗沈荒故作酒誨以戒

孝靈帝末羣官百司並涵于酒斗酒至千錢

論

典論論文

文人相輕自古而然傅毅之於班固伯仲之間耳而固
小之與弟超書曰武仲以能屬文為蘭臺令史下筆不
能自休夫人善於自見而文非一體鮮能備善是以各
以所長相輕所短里語曰家有敝帚享之千金斯不自

見之患也今之文人魯國孔融文舉廣陵陳琳孔璋山
陽王粲仲宣北海徐幹偉長陳留阮瑀元瑜汝南應瑒
德璉東平劉楨公幹斯七子者於學無所遺於辭無所
假咸以自騁驥騤於千里仰齊足而並馳以此相服亦
良難矣蓋君子審已以度人故能免於斯衆而作論文
王粲長於辭賦徐幹時有齊氣然粲之匹也如粲之初
征登樓槐賦征思幹之元猿漏卮圓扇橘賦雖張蔡不
過也然於他文未能稱是琳瑀之章表書記今之儕也

應瑒和而不壯劉楨壯而不密孔融體氣高妙有過人者然不能持論理不勝辭至於雜以嘲戲及其所善揚班儔也常人貴遠賤近向聲背實又患闇於自見謂已為賢夫文本同而末異蓋奏議宜雅書論宜理銘誄尚實詩賦欲麗此四科不同故能之者偏也唯通才能備其體文以氣為主氣之清濁有體不可力彊而致譬諸音樂曲度雖均節奏同檢至於引氣不齊巧拙有素雖在父兄不能以遺子弟蓋文章經國之大業不朽之盛

事年壽有時而盡榮樂止乎其身二者必至之常期未
若文章之無窮是以古之作者寄身於翰墨見意於篇
籍不假良史之辭不託飛馳之勢而聲名自傳於後故
西伯幽而演易周旦顯而制禮不以隱約而不務不以
康樂而加思夫然則古人賤尺璧而重寸陰懼乎時之
過已而人多不彊力貧賤則懼於饑寒富貴流於逸樂
遂營目前之務而遺千載之功日月逝於上體貌衰於
下忽然與萬物遷化斯亦志士大痛也融等已逝唯幹

著論成一家言

典論論方術

穎川郤儉能辟穀餌伏苓甘陵甘始亦善行氣老有少容廬江左慈知補導之術並為軍吏初儉之至市伏苓價暴數倍議郎安平李覃學其辟穀餐伏苓飲寒水中泄利殆至隕命後始來衆人無不鴟視狼顧呼吸吐納軍謀祭酒弘農董芬為之過差氣閉不通良久乃蘇左慈到又競受其補導之術至寺人嚴峻徃從問受闇豎

真無事於斯術也人之逐聲乃至於是光和中北海王
和平亦好道術自以當儻濟南孫邕少事之從至京師
會和平病歿邕因葬之東陶有書百餘卷藥數囊悉以
送之後弟子夏榮言其尸解邕至今恨不取其實書儻
藥劉向惑於鴻寶之說君游眩於子政之言古今愚謬
豈惟一人哉

周成漢昭論

或方周成王於漢昭帝僉高成而下昭余以為周成王

體上聖之休氣稟賢妣之胎誨周召為保傅呂尚為太師口能言則行人稱辭足能履則相者導儀目厭威容之美耳飽仁義之聲所謂沈清玄流而沐浴清風者矣猶有咎悔聆二叔之謗使周公東遷皇天赫怒顯明厥咎猶啓諸金縢稽諸國史然後乃悟不亮周公之聖德而信金縢之教言豈不暗哉夫孝昭父非武王母非邑姜養惟蓋主相則桀光體不承聖化不胎育保無仁孝之質佐無隆平之治所謂生於深宮之中長於婦人之

手然而德與性成行與體并年在二七早智夙達發燕書之詐亮霍光之誠豈將有啟金縢信國史而後乃悟哉使夫昭成均年而立易世而化貿臣而治換樂而歌則漢不獨少周不獨多也

漢文帝論

皆有苗不賓重華舞以干戚尉佗稱帝孝文撫以恩德吳王不朝錫之几杖以撫其意而天下賴安能弘三章之教愷悌之化欲使曩時累息之民得闊步高談無危

懼之心若賈誼之才敏籌畫國政特賢臣之器管晏之姿豈若孝文大人之量哉

帝集諸儒於肅城門內講論大義嘗嘉漢文寬仁立默務欲以德化民有賢聖之風時諸儒或以孝文雖賢其通達國體不如賈誼帝由是著太宗論

漢武帝論

孝武帝承累世之遺業遇中國之殷阜府庫餘錢帛倉廩畜腐米因此有意平滅匈奴而廓清邊境矣故即位之初從王恢之書設馬邑之謀自元光以迄征和五載之間征匈奴四十餘舉踰廣漠絕梓嶺封狼居胥

禪姑嶧梁北河觀兵瀚海刈單于之旗勦閼氏之首探
符離之窟掃五王之庭納休屠昆耶之附獲祭天金人
之寶斬名王以十數馘首虜以萬計既窮追其敗亡又
摧破其積聚虜不暇於救死扶傷疲於孕重墮殞元封
初躬執武節告以天子自將懼以兩越之誅易彼符號
可為威震匈奴矣

交友論

夫陰陽交萬物成君臣交邦國治士庶交德行光同憂

樂共富貴而友道備矣易曰上下交而其志同繇此觀之交乃人倫之本務王道之大義非特士友之志也白虎通曰朋友之道有四近則正之遠則稱之樂則思之患則死之揚子法言曰朋而不心面朋也友而不心面友也說苑曰魏文侯歎田子方曰自友方也君臣益親百姓益附吾是以知友士之功焉

議

田疇辭封議

答達教逃祿傳載其美所以激濁世勵貪夫賢於戶祿
素餐之人也故可得而小不可得而毀至於田疇方斯
近矣免官加刑於法為重

連珠

連珠三首

蓋聞琴瑟高張則哀彈發節士抗行則榮名至是以申
胥流音於南極蘇武揚聲於朔裔

蓋聞四節異氣以成歲君子殊道以成名故微子奔走

而顯比干剖心而榮

蓋聞駕蹇服御良樂咨嗟鉛刀剖截歐冶歎息故少師
幸而季梁懼宰嚭任而伍員憂

銘

露陌刀銘

於鑠良刀胡煉亶時譬諸麟角靡所任茲不逢不若永
世寶持利用衛身以威弗治

賜鍾繇五熟金銘

於赫有魏作漢藩輔厥相惟鍾寔幹心膂靖恭夙夜匪
遑安處百寮師師楷茲度矩

文

即位告天文

皇帝臣丕敢用元牡昭告於皇皇后帝漢歷世二十有
四踐年四百二十有六四海困窮三綱不立五緯錯行
靈祥並見推術數者慮之古道咸以為天之厯數運終茲
世凡諸嘉祥民神之意比昭有漢數終之極魏家受命之

符漢主以神器宜授於臣憲章有虞致位於丕丕震畏
天命雖休勿休羣公庶尹六事之人外及將士洎於蠻
夷君長僉曰天命不可以辭拒神器不可以久曠羣臣
不可以無主萬幾不可以無統丕祇承皇象敢不欽承
卜之守龜兆有大橫筮之三易兆有革兆謹擇元日與
羣寮登壇受帝璽綬告類于爾大神唯爾有神尚饗永
吉兆民之望祚于有魏世享

哀策文

武帝哀策文

痛神曜之幽潛哀鼎俎之虛置舒皇德而詠思遂脜臆
以莅事矧乃小子夙遭不造斂斂在疚嗚呼皇考產我
曷晚棄我曷早羣臣子輔奪我哀願猥抑奔墓俯就權
變卜葬既從大隧既通漫漫長夜窈窈玄宮有晦無明
曷有所窮鹵簿既整三官駢羅前驅建旗方相執戈棄
此宮庭陟彼山阿

誄

弟蒼舒誄

曹冲字蒼舒文帝之弟也少聰察岐嶷有成
人之智年十三病卒曹公哀甚為聘甄氏亡

女與合葬贈

騎都尉印綬

惟建安十有五年五月甲戌童子曹蒼舒卒嗚呼哀哉
乃作誄曰

於惟淑弟懿矣純良誕豐令質荷天之光既哲且仁爰
柔克剛彼德之容茲義肇行猗歟公子終然允臧宜逢
介祉以永無疆如何昊天彫斯俊英嗚呼哀哉惟人之

生忽若朝露役役百年亹亹行暮矧爾夙夭十三而忘
何辜於天景命不遂兼悲增傷侘傺失氣永思長懷哀
爾罔極貽爾良妃襚爾嘉服越以乙酉宅彼城隅增丘
峩峩寢廟渠渠姻媾雲會充路盈衢悠悠羣司岌岌其
車傾都蕩邑爰迄爾居魂而有靈庶可以娛嗚呼哀哉

制

終制

禮國君即位為椑存不忘亡也昔堯葬穀林通樹之禹

葬會稽農不易畝故葬於山林則合乎山林封樹之制
非上古也吾無取焉壽陵因山為體無為封樹無立寢
殿造園邑通神道夫葬也者藏也欲人之不得見也骨
無痛痒之知冢非棲神之宅禮不墓祭欲存亡之不贖
也為棺槨足以朽骨衣衾足以朽肉而已故吾營此丘
墟不食之地欲使易代之後不知其處無施葦炭無藏
金銀銅鐵一以瓦器合古塗車芻靈之義棺但漆際會
三過飯含無以珠玉無施珠襦玉匣諸愚俗所為也季

孫以璵璠斂孔子厯級而救之譬之暴骸中原宋公厚
葬君子子謂華元樂莒不臣以為棄君於惡漢文帝之不
發霸陵無求也光武之掘園陵封樹也霸陵之完功在
釋之原陵之掘罪在明帝是釋之忠以利君明帝愛以
害親也忠臣孝子宜思仲尼丘明釋之之言鑒華元樂
莒明帝之戒存於所以安君定親使魂靈萬載無危斯
則賢聖之忠孝矣自古及今未有不亡之國亦無不掘
之墓也喪亂以來漢氏諸陵無不發掘至乃燒取玉匣

金鏤骸骨并盡是焚如之刑也豈不重痛哉禍由乎厚
葬封樹桑霍為我戒不亦明乎其皇后及貴人以下不
隨王之國者有終沒皆葬澗西前又以表其處矣蓋舜
葬蒼梧二妃不從延陵葬子遠在羸博魂而有靈無不
之也一澗之間不足為遠若違今詔妄有所變改造施
吾為戮尸地下戮而重戮死而重死臣子為蔑死君父
不忠不孝使死者有知將不福汝其以此詔藏之宗廟
副在尚書秘書三府

漢魏六朝百三家集卷二十四